

睽

車

志

宋郭彖著

睽車志

上海蔡光社藏版

睽車志卷一

宋 郭象 撰

宣政間。長安人有牧牛於野者。數亡其牛。尋之。牛臥一處。薦草肥軟。方丈之內。異於常草。自後每於其處。尋輒得之。一日大雪。視牛臥處。獨不積。異而掘之。深二丈許。得石匣。刻曰開元祭地黃琮。啟之。得琮形如今制。但白色美玉。而其中方寸許。作新粟也。大資鄭公億年說三事

長安近城官道之側。有大古塚。以當行人常所往來。故獨久存不毀。建炎初寇亂。有人發之。得古銅鐘鼎之屬甚多。驗歎識。皆三代物。冢爲隧道窟室。土堅如石。周匝皆刻成人物侍衛之狀。其冠服。丈

夫則幘頭。婦人則段紵。衣皆寬袖。頗類今制而小異。乃知數千載冠服。已嘗如此。

宣和間。林靈素。希世寵倖。數召入禁中。賜坐便殿。一日。靈素倏起。趨階下。曰。九華安妃且至。玉清上真也。有頃。果中宮至。靈素再拜殿下。繼又曰。神霄某夫人來。已而果有貴嬪繼至者。靈素曰。在仙班中。與臣等列。禮不當拜。長揖而坐。俄忽愕視。暗曰。是間何乃有妖魅氣耶。時露臺妓李師師者。出入宮禁。言訖而師師至。靈素怒目。攘袂亟起。取御爐火箸。逐而擊之。內侍救護得免。靈素曰。若殺此人。其屍無狐尾者。臣甘罔上之誅。上笑而不從。

林靈素未遭遇時。落魄不檢。嘗從旗亭貰酒。久不歸直。其人督之。靈素計窘。卽舉手自捫其面側左頰。已成枯骨髑髏。而餘半面如故。

謂其人曰。汝迫我不已。我且更捫右頰矣。其人驚怖。竟爲折券。

韓

御知承說

左賁字彥文。有道術。游京師。依段氏。甚禮重之。段氏母病。賁爲拜章祈福。乙夜羽衣伏壇上。五鼓始蘇。愴然不懌。久之。段氏甚懼。詰之。賁曰。太夫人無苦。三日當愈。祿算尙永。段問先生何爲不懌。賁曰。適出金闕。忽遇先師。力見邀。已可不辭。後五日當去。賁本意且欲住世。廣行利益。今志不遂之不樂爾。旣而段母如期而疾良已。越二日。賁卒。段氏悲悼。具棺衾歛之。賁兄居洛。段命凶肆數人。舁棺送之。旣舉棺。辭不肯往。云棺必無屍。某等業此久矣。凡人之肥瘠大小。若死之久近。舉棺卽知之。今此甚輕。是必假致宅物。至彼或遭誛詰。段與之約曰。苟有累。吾自當之。旣至。兄果疑。發視。衣衾而

已。段言其故。乃悟其尸解。紫微王舍人稽中說二事

孟通判者。密州人。丞郡青社。秩滿還鄉。素慕神仙長生之說。一日有道者謁之。故絮藍縷。疥癩狼藉。謂孟曰。以公好道。故來謁公。頃在青州。印施度人經。我嘗受一軸。公頗憶否。視文書御軸。取觀真囊所施也。又曰。我能燒汞爲白金。願以相授。孟曰。某不願也。乃曰。必不欲。姑試一觀。自於腰間取鏹數百。願孟從者。令市汞至。則以實鼎。熾炭環之。解帶間劑投其中。有頃。取傾出。真白金也。他日。又至。曰。我來與公別。適得佳茗。願共嘗之。探懷取建茶一塊。裹以壞布。蟻蝨撲緣。孟有難色。辭以無茶具。道者取紙裹搥碎。願爐中銀鑪。取水煮之。分注兩盞。揖孟舉啜。孟辭以太熱。久之。又言已冷。當留候再溫飲之。道者愠曰。果相惡耶。取茗覆之。不揖而起。孟猶送之。

門。還見所覆茗。地皆黃金。其蓋及鐙。茗所漬處。表裏皆金。始知其異人。亟追訪之。已失所在。

儀真報恩長老子照。言紹興間。嘗與同輩三人。行脚至湖南。經山谷間。迷惑失道。暮抵一古廢蘭若。相與投宿。牆屋頽圯。寂無人聲。一室掩戶。若有人居中。惟土榻地爐。以灰掩微火。傍置一瓦缶。視之則煮芋也。諸僧正饑。食之甚美。已而視糊窻。乃澆化中故綾紙。度牒室中。有數大甕。所貯或芋。或栗。或山蕓。了無鹽醃之屬。俄有一人荷負芋栗自外歸。被髮體皆黃毛。衣故敗僧衲。直入坐土榻。見客不交一談。與語亦不應答。夜既深。皆倚牆壁坐睡。暨天曉。已失其人所在。惟爐火傍。置四瓦缶。其一已空。蓋其人食之而出。餘三缶皆芋栗。煮已糜熟。若以餉客者。三人食之而出。又行巖谷荆莽

中二十餘里。乃得路還。

紹興二十八年。外舅楊紫微。與陳申公俊卿。同爲小著省中。共處一位。在國史局堂之西閣。其東閣。則大著位也。時方虛其處。一日晨入省。則有老兵。雉經于西閣。掛梁間。趣命解之。已死。二公不欲遽入。乃暫徙東位。外舅謂同省諸公曰。僭居此位。殊厚顏也。俄報二公同除大著。事雖倉卒。而應兆如此。

趙汝言字允之。死已數年。有遺女住子。濟熙乙未之冬。住子暴疾。其兄謙之。憐其孤幼。念之甚至。一夕。夢至一所。高闕長廊。金碧輝煥。汝言在其間。方與一金紫老人。對立而語。問老人爲誰。傍侍者曰。凌待制也。汝言援筆。題詩于壁曰。彈指紅塵二十年。歸來瀛海浩無邊。夢魂相遇因隨念。珍重前生兄弟緣。老人繼題其後曰。處世

休論大小年。瀛關從此斷塵緣。芝階雲路逍遙處。羽蓋飛鮓不用鞭。汝言復顧語曰。住子已無恙。以兄念至。緣因念結。故得與兄暫相遇耳。謙之方悟其已死。慟哭而覺。謙之自傳其事甚詳。

淳熙庚子。八月十五日。平江常熟縣大火。屋居焚蕪。大半灼爛。死者十餘人。先一夕。許浦戍卒。自府請冬衣還。頓止距縣一舍。戍將夢被追至一所。有冠服坐殿上。呼戍將至庭下。謂之曰。明日常熟有變。毋得縱部下爲亂。且令責軍令狀。旣寤驚疑。及曉。令戍卒皆止。未得進。獨從數卒。先止郭外塔院。遲疑未敢入。俄而火作。方烈焰猛熾。若戍卒入邑。必因救火。剽掠爲亂矣。神告何其昭昭也。

平江里俗。舊傳讖記云。潮過唯亭出狀元。又云。西山石移。狀元南歸。淳熙庚子。三月二十二日。吳縣穹窿山大石。自麓移立山半。石所

經。草木皆壓藉。宛然行迹可驗。其秋八月十八日夜。海潮大至。過唯亭環城而西。穹窿在城西。唯亭距城東北四十五里。明年省試。平江歲貢者盡下。唯黃由以國學解中選。未廷試。皆傳黃由魁天下。已而唱名果然。由字子由。平江人。而用國學發薦。南歸之驗也。承節郎孫俊民家于震澤。歲除夜。夢長大人。其高出屋。行通衢。一手持牛角。一手持鐵釘槌。睥睨其家。以牛角擬門上。欲釘之。夢中與之辨解。長人乃去。以其角釘對門姚氏家。其春姚氏舉家病疫。死者數人。

湖妓楊韻。手寫法華經。每執筆必先齋素。盥沐更衣。後病死。死之夜。其母夢韻來別云。以經之力。今卽往生烏程縣廳吏蔡家作女。時蔡妻方娠。是夜夢有肩輿及門者。迎之則韻也。云來寄宿。寤而生。

女。其母他日來視。女爲之啞然一笑。人咸異之。

龍舒人劉觀。任平江許浦監酒。其子堯舉。字唐卿。因就嘉禾流寓試。僦舟以行。舟人有女。堯舉調之。舟人防閑甚嚴。無由得聞。既引試。舟人以其重扁棘闥。無宅慮也。日出市貿易。而試題適唐卿私課。既得意。出院甚早。比兩場皆然。遂與舟女得諧私約。觀夫婦一夕夢黃衣二人。馳至報勝云。郎君首薦。觀前欲視其勝。傍一人忽掣去。云劉堯舉近作欺心事。天符殿一舉矣。覺言其夢而協。頗驚異。俄而折卷。堯舉以雜犯見黜。主文皆歎惜其文。既而觀以夢語之。且詰其近作何事。匿不敢言。次舉果首薦于舒。然至今未第也。

姚行
可說

衢州江山毛知錄。嘗夢入冥。吏引至一處。若官府兩廡皆大屋。貯錢

滿中。各以官爲標識。問之曰。此俸祿也。毛視其俸。吏指一處。積鑽五百餘千。曰。此爾俸也。位至丞郡。又見榜別積十二千。題目饒州。德興某人俸。毛後爲徽州錄參。值方寇作。州倅逃去。毛攝倅兩月。而賊至。遇害。德興某人者。後登第。授一尉。到官一月而卒。

劉運使文伯說

信州小兒醫蔡助教者。其鄰嘗遣火。隨即撲滅。事不聞官。他日蔡與那官偶語及。那官曰。是不可不懲。卽白郡將。逮其鄰人。繫之數日。乃撻而遣之。鄰人在繫。染疫歸。卽傳其家。不一月。盡室皆死。後數歲。蔡如廁。忽見鄰人。逐而毆之。卽得疾死。其鄉人有幹之臨安者。見蔡於通衢露首。二黃衣人驅之北去。鄉人前問勞。蔡曰。吾以公事被逮。將往棘寺。忽忽而別。鄉人歸。始知蔡已殂。其見之日。乃其死之日也。

周濟美左司說

大參王公子明。未貴時。待一俸缺。夫人嘗夢有人見呼。運使恭人喜。以語公。公亦自喜。將爲監司。後果爲浙漕。而夫人死。其後公登政府。始知前夢。神告其止於爲運使妻爾。黃倅
談說

文學楊良能。邦禮。其妻華亭鄭氏。歸甯適其家。改葬祖姑。啟棺儼然不朽。視其面貌長短。與鄭氏無小異。計其死之年。乃鄭氏生之年也。衆皆驚異。鄭氏甚惡之。因感疾。未幾而卒。楊良
能說

宗室士紆。宣和間。以未有子。每歲生朝。爲干道齋。以祈嗣續。一日齋坐已定。忽有丐者。喧門求入。士紆納之。坐者莫肯與齒。竟就下位。食已。衆皆散去。丐者獨留彷徨。士紆揖與語。乃問公所求何事耶。告之。故則曰。此亦易事。士紆方督視徹器。不暇詳款。丐者告去。期明日來。且探懷出藥七粒。曰。食藥也。令士紆吞之。邑君自屏間望

見遙呼止之。丐者笑而去。士紆握藥以入。邑君令舒視之。但一朱書呂字。數日不消。王彥邱舍人說二事

蔡純誠通判。與一僧相善。尊宿也。忽得書招蔡。既至。而僧已跌坐而逝。先封小合。囑其徒云。蔡至貧。此合中吾衣鉢金二兩。來則與之。蔡至哭之慟。僧復開目。與語良久。且云。當有道人來燒香。非常人也。可隨之。當有所遇。言訖。瞑目長往。俄果有一道者。至蔡前揖之。道者熱香徑去。蔡隨其所往。行甚遠。道者問隨我何求。蔡言素苦寒疾。百方不愈。道者乃握其兩手。頃之。其熱爲灼。蔡云。今徧體皆煖。惟腦尙冷。則又以手熨其腦。應手卽溫。乃謂蔡曰。勿庸隨我。用所衣布袍贈蔡。曰。某年月日。岳陽樓前。用錢三百七十買此。言已長揖別去。蔡收其袍藏之。宅年。蔡有故至山東一郡。茶肆中復遇。

道者相見甚喜。袖間出綸竿。緝布縷爲釣。笑擲地。徐引之。得大鯉。相攜酒壚。鱸食之而去。

吳興楊禮承務。其母縣主。素與尼法安善。安嘗夜夢。有青蓮花。其女曰。蓮師自嬰孩。則口常作蓮花香。然生四歲而夭。火之。其骨自顛至足。皆相鈎聯。舉之不絕。楊禮承務說三事

湖州妙喜村民相二十。素狡獪。爲一鄉之害。年五十。忽悟所爲。痛自刻勵。日誦佛號。數年不暫輟。忽一日。徧詣素所往來者。自言所積惡業至重。須焚身以懺。各丐薪數束。不旬日。得薪數百束。積高二丈許。結紙菴其顛。刻日自焚。觀者環遶。然村人猶畏之。無敢與之下火。相乃口銜炬。合掌端坐菴中。以炬四然。須臾。煙焰相合。乃至指節燼落。巖然不動。

臨安下竺式道者。苦行修懺累年。置火鑊于像前。晝夜持誦環遶。遇困倦。卽以指觸鑊而醒之。晚年。兩手惟存四指。建懺堂甚雄。每架一椽。磬一鑿。輒誦大悲神咒七遍。建炎間。虜至。積薪其下焚之。薪爲之盡。而屋不然。乃不復焚。

岳侯死後。臨安西溪寨軍將子弟。因請紫姑神。而岳侯降之。大書其名。衆已驚愕。謂其花押。則宛然。平日眞迹也。復書一絕云。經累中原二十秋。功多過少未全酬。丹心似石今誰愬。空有游魂遍九州。丞相秦公聞而惡之。擒治其徒。流竄者數人。有死者。左司周濟美說

皇甫坦。自云數百歲人。言人休咎時驗。嘗館于道院。有人訪之。值其宅出。其人素與相善。留待之。啟其門封。惟一榻蕭然。索席下。得一半臂。鮮血淋漓。驚懼而出。俄而垣至。相接甚驢。顧謂童子。風冷可

於席下。取吾着睡衣來。童子卽取半臂。坦對客衣之。衣甚新潔。初無血也。喜爲人書字。亦多驗者。汪國正遠猷。登第已逾壯室。以未有子爲憂。求字於坦。書一湧字。已而汪授吳江簿。到官而生男。乃悟湧字。江下男也。有士人赴省試。坦書落字與之。士人不樂。乃揭榜及第二十三名。因視其字。草頭卽二十。其傍從水。不爲點而作三畫。各字右筆。止作一點。乃名字耳。汪彥遠國正說

李知己任永嘉教官。公廨有一樓。怪不可居。或飛擲瓦礫。或聞歎息謳吟之聲。家人畏懼。莫敢正視。惟知己在家則寂然。一日郡庠季試。教官例當宿直舍。知己預憂其擾。乃置几案筆硯于樓上。連紙數幅題其前。問怪所從來。令書其後以對己。乃篩灰其下。扁鑄謹識而出。間兩日歸。詢其家。則怪不復作。啟鑰視灰。凝然無迹。而案

上紙書皆盈幅。自言姓石氏。頃隨兄赴永嘉幕。官未至郡。溺死。逮今二十年。營魂蕩無所歸。偶見此樓空閑。故暫寄此。非敢爲厲。近媒者爲議城南洪秀才姻。方且歸彼。不復此留矣。字體纖弱。眞女子筆迹。書辭數百言。纏纏有條理。知己亦敬異之。宅日偶至城南忠義廟。其間神像。果有洪秀才。蓋義兵拒寇死事者也。永嘉陳韶美說

孫機仲郎中紹遠。父元善。价居平江。嘗有幹過市。見鬻籠餅者。乃其亡僕。孫自疑白。日見鬼。唾之。僕遽前拜。祈曰。主翁無然。將使某賈不售。孫問爾已死。何乃在此。僕請孫至。居人稀僻處。曰。壽數未盡。藥誤致殂。而陰府不見收錄。營魂汎然。無所之適。故爲此。以度日。今闌闔中。如某者。且千數。只如宅中。廣官人乳媪亦是也。謂如不信。第今夕勿令復與兒同寢。彼將怏怏不自得。俟其熟寐。取楊枝

炭火。醋淬之。以灼其體。必有異。孫甚驚。歸如其說。火之所灼。忽有青煙。出衣被間。俄而煙絕。乳媪已失所在。衣被如蟬蛻焉。廣官人者。機仲弟紹祖。字文仲者也。張判院良臣漢卿說四事

支提長老善秀。言其鄉里有人。以田獵畢。弋爲業者。其妻晝寢。忽見牀前地裂。深不可測。俯視見城郭屋宇。恍惚間身墮其間。至殿庭仰望。有王者坐其上。左右皆牛頭。阿旁主者。命以大刀。斷其手足。剖割心肺。懸挂之。自踵至頂。細剉血肉如泥。乃揉和成團塊。業風吹之。俄復爲人。方其身被慘毒。而其識神在傍。見其屠剝痛苦。不可名狀。既醒。則身故在榻上。移時始能言。百體餘痛。經日乃定。自後或經歲。或半載。所見輒如此。不勝其苦。一日又然。則聞殿上人謂之曰。當往求善秀長老說懺悔。可以滅罪。乃如其言。謁秀道其

故秀教之誦破地獄真言。且爲演說懺滌。自後乃不復覩前事。竟亦善終。

成忠郎傅霖。淳熙庚子。任臨安監。嘗建請於北關。創立新倉。攘取民居八十餘家。毀撤屋宇。老稚流離。怨嗟謹沸。初霖夜坐書閣。草定建請利便。忽見其姊婿林路。分家二亡婢。自前行過。徑趨宅堂。方驚愕間。其妻及女皆寐焉。急呼醒問之。云自見其婢自外來。云與小娘子作伐。詢其女而夢協。甚惡之。其女遂病。倉成而地卑濕。或言曩數有滄沒之患。霖愈益憂恐。乃高爲地版。離地二尺。所費不貲。又欲大營備水車骨之具。官無餘錢。其家素富。乃從妻丐五百緡。妻拒不與。霖窘迫。以刃自裁。救之不死。醫者以桑皮縫合其創。傅藥雖愈。而頷頸攣不復伸。俯首不能仰視。神識沮喪。遂成心疾。

請祠祿以歸。

喉車志
卷一

十九

駿車志 卷一

二十

駿車志卷一終

睽車志卷二

宋 郭象 撰

武翼大夫焦仲。居四明。性嗜殺。日以彈射臂鷹走狗爲樂。所殺不可勝紀。營一宅新成。遷居之。房闔間巨蛇縱橫。至相糾結如瓣。殺之復然。家有三男二女。長曰嗣昌。業進士。忽得心疾。朝夕慟哭。云憶其亡父母。其妻謂之曰。堂上坐者。汝父母也。何狂易至此。嗣昌憤然曰。此人乃害吾父母者。恨未能殺之。以復讐。然不可與之同居。日挽其妻以出。不可禁止。乃聽其外居。嗣昌竟以病惑死。次子季子。不數年。相繼殂。晚年仲復喪妻。生計益落。子然一身。獨享高壽。而健啗康強。嗜殺如故。豈佛經所謂魔刀所持者耶。

楊虞仲眉州人。丁丑王勝甲科擢第。官亦早達。典蜀郡。先是普州樂至縣有臨水精舍。主僧夜夢一貴人跨馬而入曰。我山神也。今暫還。不久當復往歸。寤而有金堂縣尉令習。輿病適至。信宿而卒。習父攜家居。初未聞習病。一夕夢習緣檄歸。喜甚。亟迎門。及下馬。揖而言曰。習不孝。不得終事父母。今當爲眉山楊氏子。名虞仲。後二十三年。仍以直言中甲科。官職顯於今世矣。辭訣而去。父驚愕而寤。其日訃至。攜痛悼甚。宅日物色。訪眉山楊氏。實以是歲生子。及長。名虞仲。登第之年。正習死後二十三年也。提刑何慤作習墓表。述其事甚詳。虞仲倅遂甯。日令狐氏有訟事。自宅郡送遂甯。慮不得直。乃以墓表墨本。因虞仲賓達之。虞仲亦隱其事。然蜀人多知之者。表弟沈作肅錄其墓表見遺。

忠愍李公若水。宣和壬寅。尉大名之元城。有村民持書至云。關大王有書。公甚駭愕。視其緘云。書上元城縣尉李尙書。漢前將軍關雲長押。詰民何自得之。云夜夢金甲將軍。告某曰。汝來日詣縣。由某地逢著鐵冠道士。索取關大王書。下與李縣尉。旣覺驚異。勉如其言。果遇道士得書。不敢不持達。公發書。其間皆預言靖康禍變。以事涉怪。卽火其書。遣其人。不復問。作詩紀之云。金甲將軍傳好夢。鐵冠道士寄新書。我與雲長隔異代。翻疑此事大荒虛。公後果貴顯。卒蹈圍城之禍。兆朕之萌。神告之矣。公始名若水。後改賜今名。其子浚淳。記其事。刻之石。

紹興府治。依山。林樾深茂。徃徃有怪。淳熙辛丑。有數卒直宿蓬萊閣。夏熱各散寢。中夜。一卒曰張富者。見紅裳女子。冉冉逼近直前。坐

其腹上。奮起。摔之。忽不見。但兩手狐毛滿把。

汀漳間。有古驛多怪。嘗有士人。獨宿西廂。乙夜見羣鼠。自梁拱間緣壁下地。莫知其數。固已異之。俄又見數鼠。共掣一物。若小箱篋然。置地發之。皆袍幘之屬。競取服之。儼如唐裝。冠履皆備。既而遞爲進趨。揖遜之狀。士人素有膽氣。拊牀叱之曰。鼠輩敢爾擾人。殊不驚避。遽起。取席下白挺亂擊之。倉猝間。誤觸燈滅。益盡力搗擊。俄而寂然。明旦視牀前。死鼠滿地。

揚州教官陳德明光宗說

道州孚惠廟。靈響甚著。淳熙己亥。彬寇大作。侵軼州境。郡守趙公郎中汝誼。以郡無城池。聽民避寇。自便。而自誓死守。指使樊謹。請入賊。說以禍福。不從。則死之。卽日見害。賊進至江華。距城不一舍。公益憂憤。倦而假寐。見二大夫。儒衣冠。貌甚偉岸。來謁且言。毋恐。公

意其孚惠之神也。卽具冠帶往謁。俄有燕數千。自祠所隨。公朱幡。蜚集黃堂上。翔而爲三。起而復集。喙皆外嚮如一。漏盡數刻。繇所從方陳而去。是夕寇遁。民有被俘逃還者。聞賊言。道州號令明信。能使人不可犯。乃捨而去。郡教官章穎。記其事刻石。

貳卿周公自疆。淳熙辛丑。自靜江移鎮丹陽。有第宅在上饒。將取道過家。未至。前守舍卒正。晝聞鉦聲。自宅堂出。亟啟鑰視之。則聲在後堂大櫃中。復開櫃尋之。則聲在地下。久之覺聲寢遠而滅。後數

月。公捐館。

陳宏甫
承務說

提轄左帑。張朝奉遜。四明人。始改秩。知常州晉陵縣。任滿挈家東還。夜泊宜興驛前。時正暑。張有子。年二十許。獨與之寢于舡之頭倉。是夜月明如晝。四鼓後。婢輩忽若驚魔。譁言暗中若有人手叢雜。

捫索之狀。又聞舡背。亦如拏攫之聲。張驚起呼叱。久乃定。卽開舡門。出立舡邊。號召舟子輩。蓋疑其盜也。已而還寢。則不見其子。呼之不應。明燭索之。無所得。詰舡外人。初未嘗見其出。舉舟惶駭。擾擾以至天曉。對岸有泊舟者。遙謂舟人曰。我曹夜寢舡背。約四鼓時。忽見彼舡背長大人十數。若有所求索。俄有長臂大手十數。出水中。共捧一人入水矣。乃使人沒水求之。得其尸焉。同年陳子榮宗丞說

泉司幹官陳子永泳。每夜用釋氏法。誦咒施食。仍蕪尊勝咒幡數紙。嘗宿鈇山驛舍。入夜。有婦人立牀前。叱之。云。毋恐。我來從官人覓經幡耳。許之。忽不見。明日祝而燒之。夜復來。拜謝而去。陳宏甫承務說

平江黃球張虞部家。豪於財。第宅甚宏壯。張爲人質直。素不信巫怪之說。每有興築。不擇時日。嘗作一亭。掘地得肉塊混然。初無割剝

之迹。俗謂太歲神。張不爲異。命取瓦盆。合而送之水中。竟就基創。且遂名爲太歲亭。又嘗有客至。呼取衣冠。未有應者。俄而所畜犬。首頂其帽。束其帶。背而出。左右駭愕。張徐謂犬曰。養汝幾年。今日始解人意。就取服之。乃出揖客。客退而犬自斃于庭矣。王日章承務說

秀州海鹽縣漁戶楊刺旗。嘗寢漁舟。夜夢被人擒去。刺其面爲旗。驚寤而面頰猶痛。俄而天曉。亟起就缸舡照之。初無迹。第見魚鰕擁出水面。團結成塊。擲網盡得之。中有一物。如鼎狀。持歸刮洗泥垢。則純金也。因是致富。秀人至今呼爲楊刺旗家。承信郎楊伯詳說

華亭陳之方。爲臬司屬官。未赴任。聞故人有任維楊倅者。陳往謁之。留館廳事之側。一夕就寢。似夢非夢。見一婦人來言曰。我城隍夫人也。今城隍當代去。次及公。故來相報。陳還家而卒。潘周翰承務說七事

閩中一士人居華亭。有趙通判者。居烏程。約士人爲館客。久未得往。士人偶閑步。至獄祠。見一婦人緩行。一僕持一小青蓋。且挈香合。皆子從其後。徧詣殿廡。拜而焚香。畢事而出。士人隨之行數十步。婦人回顧。問士人何姓。士人告之。因復問婦人姓氏。則不答。笑以所持扇示之。上有書念七三字。士人疑其娼家姓第。但怪無書姓者。未及詳語。婦人迭取僕所持銅絲香合。以授士人。卽前行去。復隨之一里許。入一寺中。人迹稠雜。忽失婦人所在。後數日。趙倅遣僕馬持書來迎。正二十七日書也。士人異之。既至書館。每以所得香合。愛玩常寘几間。一婢常來書館。視童稚輩。每諦視香合。酷似趙亡妻。棺中舊物。入言之。倅取驗視。信然。因問士人所從得。初猶諱之。扣之再四。乃備言曩日所遇。倅問婦人服飾狀貌。乃其亡妻。

叢塗寺中也。悲惋久之。卽議舉葬。啟殯視棺側有小竅。僅容指云。淳熙庚子夏四月。湖州烏程岳祠。啟黃籙醮會。西殿鴟吻。有蛇蟠遶其上。法師葉以十四日夜拜章。言於衆曰。一二日必有風雷之變。時連日晴明。天宇澄廓。纖雲不飛。衆以其言不驗。至十六日。暮夜濃雲鬱興。須臾蔽空。迅雷風烈。雨雹交下。雹大如彈。屋瓦爲碎。衆皆凜然。移時乃定。靈壇供具。幡旗之屬。儼然如舊。畧無漂濡。乙夜雲歛。月明。視鴟吻併與蛇。皆失所在。翌日訪郊外。初無風雹之驚。蓋是時飄擊之勢。止數百步間也。

平江士人王大卞。家貧。旣卒。其友周逸卿。爲率平日交游。哀金作設。冥佛事。以薦悼之。翌日。逸卿有故出城。囑其家謹扃鑰。初夜。外門轟然自開。若有人直入。連呼逸卿。大卞專來奉謝。家人驚遽出視。

但門已闢。無他覩。

平江潘擇可。崇甯五年。以舍法貢入京。未至。夜夢衣褐。挽車三十輛。其弟端夫。衣綠隨其後。至政和三年。擇可以上舍釋褐。後三十年。端夫始就恩科。乃悟挽車三十者。三十載也。

平江人王亨正。嗜牛炙。忽病瘡半年。百藥無效。沉頓中。夢黃衣人告云。汝勿食牛。則生。更食則死。既寤。誓不復食。病亦隨愈。

京師有道人姓鄭。持一銅鈴。終日搖鳴。闐闐間。丐錢爲食。用餘。則分惠貧者。號爲鄭搖鈴。宣和末。忽迤邐南來。維揚。搖鈴丐錢如故。夜則寄宿逆旅。久之。謂主人曰。吾將死。願以隨身衣物。悉寘棺中。而焚之。已而果死。主人如其言。昇棺出城。舉者漸覺輕。復聞鈴聲。如在數十步外。俄而鈴聲漸遠。則棺愈輕。若無屍。至焚所。啓蓋視之。

惟一竹杖而已。

吳江檀邱村人陳布袋。業匠氏。其婦家在震澤。淳熙辛丑。有故來謁其外姑。將至。路逢相識金大郎者。相揖而過。陳先聞已死月餘矣。私怪之。欲至妻家。詰其信否。入門拜其外姑。又拜其妻祖。而伏不能起。扶掖已不省人。昇臥榻上。手足拘攣。若被執縛狀。閱兩時。頃乃醒。始言路逢金事。方拜欲起時。金忽自外入。直控其頸。卽覺昏憤。若有人摔之。東去海岸山顛。執問曾見金某。日爲某事否。對以與金初無干涉。皆不知之。傍有人持文書展視。云誤矣。卽執陳投別一山上。乃自尋歸路。自臨安由德清。所過街衢。人物不異常時。至潯溪。距震澤十八里。見嶽祠甚雄。面正向北門外。路平闊七八丈。入者紛紛。絕無出者。凡其所識。近亡歿者。徃徃見之。潯溪素無

獄廟。心獨怪之。既入門。欄楯皆純鐵。有人叱之出曰。汝未當留。卽由路東還。過市橋。遇後金露首。有人驅之甚速。陳問何忽猝如此。金且行且應曰。彼急取案追攝。對公事耳。陳徐至家。若過高阜甚峻。有人自後推扑。遂醒。沈檢省幹說二事

吳江蠡澤村人朱三。有子年十三四。傭於應天寺僧子孚房爲行童。淳熙戊戌九月間。孚往近市。張灣橋黃家作佛事。朱童立門外。見羣兒拾螺蚌水中。徃從之。忽見白衣人。呼之與偕行。至塘岸。與坐地上。取泥作團。強令吞之。復以泥塞其鼻耳。則昏不知人。俄覺有人毆其背。泥盡脫出。開目見金甲人。令跨一犬。乘之若南去。甚駛。卽至其家。犬躍去。而朱童仆臥籬落間。家聞呻吟。出視甚驚。莫知所從來。詰之不能語。昇歸。久之始醒。乃言其事。其家素事真武甚。

謹。疑其陰護也。

沈蒙老博士。初爲太學。率履齋生。晨起盥頰已。盆水尙溫。忽變牡丹花狀。枝葉扶疎。藥萼相承。宛然如畫。次年。同舍登科者十餘人。

老蒙

孫樗說
四事

開德府有士人。家有水養蠶。忽有菌生其腹。隱然而出。植根甚堅。觸之不落。數日大如人手。光潤燁然。眞芝草也。陶器堅滑。非可生物。理莫可詰。

龍州汧源縣公宇。一夕堂門已扃鎖。忽有妓女數人。執樂器遊於庭下。令之妻適見之。妓女俱前禱曰。妾等久爲土地祠樂妓。丐爲誦法華經。迴向則可藉以往生。妻以語令。翌日。乃請僧誦經于廟。其夜復見前妓。來謝而去。數日。又有如前來禱者。亦爲誦經。如是者

三。後令君夜獨燕坐。忽有鬼物。狀甚獐怪。前曰。土地神謝君。妓女無幾。卽皆令往生。吾且乏使。當移禍君家。令叱之。遂不見。自後妓女。亦無再來禱者。令家亦無恙。

滄州有婦人不食。惟日飲水數杯。年四十五六。而面貌悅澤。人問不食之因。自言幼年。母病臥床。家無父兄。日賣果于市。得贏錢數十。以養母。值歲歉。穀貴艱食。乃仰天禱曰。今日所獲。不足以活二人。願天憫之。使我飲水不饑。庶所得可盡以供母。遂臨井飲一杯。果不饑。自是亦不思食。又數歲。而母卒。時不食已三十年矣。

執政府候兵任章。嘗因小疾。忽昏憤。不知人。越一日乃醒。自言初見二人。若公皂。持檄來逮去。如行山野間。教十里。入大城門。至一官府。引立庭下。有王者坐殿上。問姓名鄉里。叱吏云。誤矣。令引觀地

獄數處。指示受罪者。云此皆不忠不孝。昧心害物者。已而復引出城。若非向來所經。或過市里通衢。見人鬼淆混。有相識者。與語如不聞也。俄出一崖穴。送至其家。入門見身臥榻上。追者先留一人。守視其傍。迎語送者曰。復還耶。吾守之久。餒甚。已食其心半矣。奈何。恍惚間。推仆榻上。乃蘇。自此疾雖愈。而嘗怔忡恐悸。或遺忘顛錯。若失心狀。久之。因出行中途。遇一道人。瞪目視之。曰。汝心乃失其半也。吾爲汝療之。令市一牛。心至。則道人割取其半。咒祝。乃令食之。章頓覺心地安泰。不復驚怯。問道人姓氏。怒曰。吾牛心。道人也。何問爲。不受謝而去。章追逐至稠人間。遂失所在。右史趙舍人說

鎮江士人。

亡其姓名

妻悍妬。買妾不能容。每加凌虐。妾不能堪。屢欲投繯。士人憂之。有幹之金陵。丁甯懇諭其妻而行。去家纔兩日。忽中夜

聞枕前切切之聲。不見其形。自言卽其妾。引決死矣。懇求爲誦經追修。士人大憂。恐亟遣仆歸。爲其區處。暨仆還。得家信。則妾故無恙。鬼復夜至。士人詰其妄。欲奏章治之。鬼哀祈實非妾。因公憂慮之切。故假此以覬薦拔。自此不敢復出。幸勿見治。但今業已至此。不能獨廻。須且相隨。以俟公歸。許之。自此悄然。士人幹畢將還。約親故十人。同遊鐘山。士人先至。憇僧房。以俟。忽復聞鬼語。士人方怒叱之。乃云。非敢爲厲。有少事奉報耳。九客皆已至山下。其間第幾人乘螺。第幾人騎白馬。此二人宅曰貴人也。問何以知之。曰。二人所遇鬼物皆避道。餘則不然。二人者。葉審言樞密。其一人也。時方爲小官云。

紹興甲寅。七月十四日。吳縣光福雅宜山一村夫。以事私恨其母。遂

萌梟獍之心。懷刃挾槥。與母同之近村看親。中路請母藉草飲。意欲乘醉行逆。時天晴霽。俄有黑雲驟起。大震一聲。擊其子殞道傍。母初不知。而怪其衣中懷刃。有知其謀者。始以告焉。又長洲縣北原村。農夫謝三二。不敬其母。動有悖言。乾道庚寅夏五月。雨霽。欲治田水。詈母而出。纔至田所。大雷震死。范公懋德老承務說九事

紹興五年六月。大雷震無錫蘇村一民家。所用斗秤。盡掛于門外大樹之杪。行人皆見之。蓋其家每輕重其手也。

紹興三年。癸丑八月五日。平江長洲縣地震。自西北方來。樹林皆搖動。父老云。元祐九年九月二十一日。已嘗如此。又紹興十三年癸亥。三月十五日。清明。大雪盈尺。

熙甯間。有人授泗州貽盱令。自陳乞。改名雍觀。時王荊公當國。怪其

名無義理。因問改名之故。對云。夢中神告如此。固亦自不曉其義。後其人之官。一日自城還邑。從吏卒行渡浮橋。忽大風驟起。鼓其衣裾。盡沒淮水。已而從者拯救皆免。獨不得令。事聞朝廷。荆公曰。向見此人無故改名。且疑雍觀二字。或有出處。因閱山海經。乃知其爲水官之名。固慮其有水厄。今果然。其後縣僚。或夢雍觀。驕從甚盛。往來淮岸。疑其死爲水官也。

常熟縣東北百餘里。地名塗松。有姓陸人業屠。隆興初。繫一牛始下刃。牛極力索纜。負刃而逃。陸追之。數里相及。牛反顧。以角觸陸。腹穿腸潰。立死。

錢仲耕郎中佃。任江西漕。按部晚宿村落。夢青衣數百。哀鳴乞命。明日適見鬻田雞者。感夢買放。傾籠出之。其數與夢無差。

常熟縣湖南村。富人王翊。烹一鵝。已去毛入釜。鵝忽鳴。家人走報。翊不之異。熟而食之。後數日。疽發於背。病甚。顧家人云。前有二吏追我。且與茶。令先去。越二日。又云。官逮我急。勢須一往。問追者限在何日。復自應曰。明日。翌旦果殂。

暎車志卷二終

睽車志卷三

宋 郭彖 撰

淳熙庚子辛丑歲。平江比年大旱。常熟縣虞山北葛市村。有農夫姓過。種田六十畝。歲常豐熟。過覬例免秋賦。亦僞以旱傷聞官。果得免輸。自以得計。明年壬寅夏。飛蝗驟至。首集過田。禾穞皆盡。而鄰比接壤之田。蝗過不食。又有二農家。不得其姓。畎畝東西相接。東家淳樸守分。西則狡獪暴狼。淳樸之家常苦之。是年蝗至。盡集西家之田。而不入東界。西農怪之。夜以布囊貯蝗。移寘東田。有報東家。農弗之較。但祝云。果有神明。蝗當自去。明日。蝗復飛集西家。東田無傷焉。

常州一村媪。老而盲。家惟一子一婦。婦一日方炊未熟。而其子呼之田所。婦囑姑爲畢其炊。媪盲無所覩。飯成。捫器貯之。誤得溺器。婦歸不敢言。先取其當中潔者食。姑次以饋夫。其親器臭惡者。乃以自食。良久。天忽晝暝。覲面不相覩。其婦暗中若爲人攝去。俄頃開明。身乃在近舍林中。懷掖間得小布囊。貯米三四升。適足給朝晡。明且視囊米復如故。寶之至今。予始聞此事。竊謂晝暝得米。或孝感所致。如郭巨得金之類。至謂囊米旦且常盈。則頗近迂誕。然范德老爲人誠懇。必不妄傳。而村婦一節如此。亦可尙也。故錄以爲勸云。

常倅陳森。按視北使。宿頓至屬縣。無錫。暴得疾。其子克。棄兄弟。自成。擊舟迎候。解維已昏暮。時夜暗。舟中明燭。克憂懣不能寐。舟有偕。

行者。炙肉飲酒。三鼓後。忽有物狀如獼猴。自水中躍登船艙。偏重

且沒。舟人惶遽叱之。其物索肉。亟擲與之。乃沒。魏陔上舍說三事

宜興陳宰冕。有幹過宿富陽客邸中。夜燈暗且滅。見壁間有人影。舉動若傀儡狀。陳驚懼。擲枕抵壁。邸主問知其故。推門爲明其燈。乃已。明日詢之。乃一弄傀儡人。客死其室。方數日也。

鹽官馬大夫中行。妻悍妬。一婢免乳。卽沉其子。雜糖穀爲粥。乘熱以食。婢竟以血癰而殂。乃取其子。同坎瘞之。後數年。妻爲厲所憑。自言坐血池中。受無量苦。上訴於天。今當偕詣陰府。其家禱之。且許以誦經飯僧。皆不從。且云。主母今亦數盡。故得我相近。又云。馬在世僅有三年之壽。妻竟死。傳此事時。馬尙存。

盛大監勛。紹興初。知襄陽。單騎之官府。治有一樓。爲公退燕息之所。

勛常獨居樓上。屏左右。命一老兵守其下。臥榻之前。置大浴斛。取漢江水。滿注其中。日易新水。老兵久而疑之。乘勛晝寢。登梯隙壁竊視。乃見一大鯉魚。金鱗頰鬣。游泳斛中。如覺有窺者。注目壁隙。凝然久之。老兵驚懼趨下。自是徹去斛。不復取水。

岳州張佐才承務說

米元章知無爲軍。喜神怪。每雨暘致禱。則設宴席于城隍廟。東向坐神像之側。舉杯若相獻酬。往往獲應。每每得時新茶菓之屬。輒分以饋神。令典客啗。傳言以致之。間有得緡錢于香案之側。若神以勞送者。嘗晨興呼譙門鼓吏。問夜來三更。不聞鼓聲。吏惶恐。言中夜有巨白蛇。纏遶其鼓。故不敢近。米領之。叱吏去。不復問故。郡人疑其蟒精。至今父老。猶傳道之。

劉知常襄陽人。其兄爲襄陽縣之胥魁。知常始生。皓首赭面。里俗謂

之社公兒。年十四五。隨閭里出游萬山。俄獨行迷路。望遠峰之顛。有光景。趨卽之。見一道士。坐磐石上。愬以迷路之狀。且告之饑。道士袖出一物餌之。頓覺果腹。道士指以歸路。且約明日復會此。知常旣歸。一宿而皓首變黑。面皙如玉。如期而往。道士已在。遂授金丹之訣。且告之曰。吾桐栢真人。若歸他日。苟欲見我。一念及我。卽至。遂辭歸。自是脫然。有遺去塵世之心。以母老不能違侍側。乃於所居之傍。闢草廬以居。時人謂之草菴居士。而真人常降其室。崇觀間。徽宗聞其名。詔藥珠殿侍宸。徃襄陽尋訪知常。與偕至京師。見於內殿。驗其方術。知常取鹽數斛。布地上。疏爲畦畛。每畦相去數寸。爲一竅。取藥置竅中。有頃。悉成金蓮子。又取故敗鐵器錢鏰之類。以藥點化。皆成黃金。上神其術。賜以金冠象簡。緋袍皂襪。號

丹華處士。眎朝散大夫。以其所作黃金。爲金寶輪。頒藏天下神霄宮。知常又自作金合數百。貯所煉丹。分遺公卿。太師蔡元長京贈之詩。有萬鎰黃金手化鐵。五色綵雲神授丹之句。蓋記其實也。爲無

胡知縣說

和州兵火前。嘗新建兵官廨。舍旣成。兵官者。絜妻孥入居之。翌日。日宴而門不啓。兵級輩怪之。呼門不應。乃毀壁以入。而室之戶扁。復毀而入。乃見布席于地。盃盤肴核。狼藉其上。而兵官與其妻孥數人。皆踣其傍死矣。衆甚駭懼。卽以聞府。乃掘其處。深數尺。得二長石。發其下。各有二骸。疑其滯魄之爲怪也。

無爲軍城內。有秀溪者。初名錦繡溪。始未有城。溪水與外通。中有珠蚌。入水者足或履之。其大如席。旋即失。蓋亦靈異。或夜傍水際啟

穀吐其光。明皎如月。照地數丈。秀之名。蓋取川媚之義也。其後築城。絕不通外。珠遂不知所在。

泉州故陳洪進所據也。州之便廳。至今郡守不敢登。廳階常有劍影。極分明。障之不能掩。削之不能去。郡人神而畏之。屋今敝甚。而不敢葺。近城法石寺。洪進墓在焉。傍有小冢。則其女之殯也。女年及笄。未嫁而死。時或形見。遇者輒死。有連江尉龔遂良。游寺中。夜見之。翌日與人言。吾體中大覺不佳。且囑後事。肩輿亟送至家而殂。又士人王宗衡。因至寺中。偶便旋於墓側。卽得心疾。狂易不知人。逾年乃愈。

李願言朝奉說二事

治平丁未歲。漳州地震。裂長數十丈。闊丈餘。有狗自中走出。視其底。皆林木。枝葉蔚然。

泉州永春縣。毘湖村民蘇二十一郎。爲行商。死於外。同輩以燼骨還其家。蘇之神隨至。語言如嬰兒。或見其形。亦能預言人休咎。有親舊往視者。蘇輒令其妻具飲饌。待之酒肴。皆不索自至。其神每來。率以黎明時。先遠聞空中擊鉦聲漸近。既至。如風雨然。自簷楹間而入。村人敬而畏之。相與立廟祀焉。至今猶存。黃童朝散說

翟公遜大參汝文。鎮會稽。歲嘗大旱。於便坐供張。命典謁者迎釋迦佛。及龍王像。與府丞同席。而自坐西嚮。盛具乞雨于二像。明日大雨霽。臨街有樓。怪不可居。民因作神像于樓上。事之甚謹。莫敢正視。公遜過之。有瓦礫自樓飛擲。正中帽簷。公遜大怒。駐車召戎官。撤去神像。毀其樓爲酒肆。一日出游。聞路傍民舍聚哭。問之曰。家有婦。爲鬼所憑。召僧道作法治之。莫能已。公遜曰。審如是。胡不

投牒訟於府。民勉從之。明日狀其事訴焉。公遜大書曰。送城隍廟。依法施行。令民齋詣廟。以褚鏹焚之。且囑曰。三日鬼不去。可來告。至次日中夜。民家覺大旋風。遶舍。屋瓦皆飛。病婦忽自床起。顛倒踉蹌。投門而出。家人追及門外。共執持之。移時乃蘇。云初見有人持牒來云。城隍追汝。遂隨之出。皆不省其他也。自此遂愈。公遜罷鎮。歸渡錢塘。潮未當應。公遜禱而請之。須臾潮至。其異皆如此類。而性資詭誕。居於常州。建大第。市瓦數十萬。公遜取視之。嫌有布紋。曰。吾方奉親居此。豈可置布紋於頭上耶。以巨挺一時擊碎。陶者請曰。卽不用布。無以藉坯。公遜命取羅數十疋給之。鄒咸平老奉議說

光州定城主簿富某。秩滿挈家還鄉。道經合肥。與其師有舊。留連數日。館於佛寺。一夕既寢。聞箱篋中切切有聲。疑其鼠也。明日發視。

中有金釵數隻。皆寸截之。別篋貯羅縠甚多。皆細剪如篔簹紋。富大驚異。出對寺僧說之。僧曰。是何愚鬼。此寺素未有怪也。言訖。僧所服三衣。皆已剪如綾縠矣。明日謁帥。作于客次。復舉其事。且云。所將布帛悉壞。惟衣服幸全爾。俄視其衣。已剪如前。富大懼。亟辭而去。後亦無宅。無爲進士李記言說

明州育王塔。靈感甚多。魏丞相南夫母。秦國大夫人。祥除飯僧寺中。丞相夫人。慶國姜氏。然香于臂。有高麗僧。適在其間。咨嗟贊異。俄丞相之猶子鯉門。指塔級間有佛現。丞相隨所指視之。良信。衆皆爭觀。悉現佛像。而各不同。或見金像。鐵像。或肉色相。或見半身。或惟見頭髻。或惟見面。觀者駭異。丞相乃於諸像中。詢衆目所同見多者。命工圖之。

程迴者。伊川之後。紹興八年。來居臨安之後洋街。門臨通衢。垂簾爲蔽。一日有物如燕。瞥然自外飛入。徑著于堂壁。家人

歸。僅取五六寸。而形體皆具。容服甚麗。見人殊不驚。小聲歷歷可辨。自言我玉真娘子也。偶至此。非爲禍崇。苟能事我。亦甚善。其家乃就壁爲小龕。香火奉之。頗能預言休咎。皆驗。好事者爭往求觀。人輸百錢。乃爲啟龕。至者絡繹。阜程氏矣。如是期年。忽復飛去。不知所在。

士人李璋妻徐氏。美艷而性靜默。居常外戶不窺。惟暮夜獨行後圃。璋初不以爲異。但每自後歸。則口吻間若咀嚼物。他日密隨覘之。則徐氏入一竹叢間。俛面捫地。若有所索。歸仍咀嚼。夜於枕邊。摸得一白石子。但視皆有齒痕。若齧殘然。已而視其箱中。齒痕之石

甚多。始怪而詰之。終隱不言。始徐氏甚妬。自齒石之後。遂不復妬。更爲寬容。璋寢婢子別楊。皆縱不問。如是累年。乃病卒。

四明人鄭邦傑。以泛海貿遷爲業。往來高麗日本。一夕舟行。聞鑼鼓聲。自遠而至。旣而漸近。則見一舟甚長。旌旗閃爍。兩舷坐數百人。嘯呼鼓棹疾進。漸近若畏人舟。徑沒水半里所。復出鼓棹如前。舟師云。此謂鬼划舡。蓋前後溺死者所爲。見之者不利。邦傑乃還。張譽初爲福州安南縣丞。郡有指使張悅。以州檄到縣。頗傲慢不遜。譽心銜之。後知福州。而悅爲本路巡轄。馬遞至州上謁。譽踞坐廳事。引悅廷參。悅甚不堪。誦與紛紜。譽命廷卒加捶。時韓王世忠駐建州。譽卽械送之。申牒懇言。悅常私悅田路分之女。強逼與亂。韓王大怒。斬悅於軍門。譽後知袁州。一日坐書室。忽如中惡。仆地不

醒。左右扶掖。進湯菜以少蘇。乃亟命取朝服來。家人問之。答曰。適見張巡轄來。便相摔拽。今須與同往辨理。言訖而卒。

從義郎呂仲權說二事

紹興初。福建寇亂。賊魁曰張義。張萬全。葉百三。凶焰頗盛。提刑李稷臣諭降之。二張譖葉於稷臣。且言初無降意。將復爲變。稷臣信之。乃植大柱於通衢。取葉以鐵索鎖縛于柱。熾炭圍遶。醢和五辛飲之。備極楚毒。稷臣躬臨視之。葉大呼曰。我已就降。何罪至此。體皆焦爛乃死。自是稷臣每獨坐時。見葉在側。大惡之。後三年。稷臣遍體生瘡。狀如火灼。痛不可忍。竟卒。

元城先生幼子景道。元城在貶所。嘗書寢。夢一道士來寢。頃之得家書。報其內子生男。而誕辰卽夢道士日也。先生異之。俄還自貶所。視所生男。狀貌宛然夢中所見也。故名之曰景道。鍾愛之異於宅

子。暨元城再貶嶺外。景道生九年矣。忽得疾。卒於家。元城聞之。悲悼不能自勝。南海道士有異術。元城命醮。以致其魂。景道果見形于位。謂元城曰。吾昔爲道士。公爲淄清節度。因射誤中吾臂。出血四合而死。今以撫育之恩。猶當償其半。元城於是爲刺臂血。書般若心經以薦之。

汴河岸有賣粥媪。日以所得錢。置鉢筭中。暮則數而緡之。間得楮鏹二。驚疑其鬼也。自是每日如之。乃密自物色買粥者。有一婦人。青衫素襦。日以二錢市粥。風雨不渝。乃別貯其錢。及暮視之。宛然楮鏹也。密隨所往。則北去一里所。闐無人境。婦人輒四顧。入叢薄間而滅。如是者一年。忽婦人來。謂媪曰。我久寄寓比鄰。今良人見迎。將別媪去矣。媪問其故。曰。吾固欲言。有以屬媪。我李大夫妻也。

舟行赴官。至此死於蓐間。臺葬而去。我既掩壙。而子隨生。我子無乳。故日市粥以活之。今已期歲。李今來發叢。若聞兒啼。必驚怪。恐遂不舉此子。乞嫗爲道其故。俾取兒善視之。以金釵爲贈。而別。俄有大舟抵岸。問之。則李大夫也。徑往發叢。嫗因隨之。舉柩而兒果啼。李大夫駭懼。因爲言。且取釵示之。李諦視。信亡妾之物。乃發棺取兒養之。

李知縣明仲說

王陔字希武。參政絢之子。有第宅。在平江之崑山。陔居家艱獨。處于廳事之側。其家婢妾頗衆。夜則扃鎖堂門而寢。一夕有老乳婢。夢中若驚魘。其聲初甚微。叫呼不醒者久之。婢輦驚起。就榻視之。則無見矣。舉家驚駭。明燭四索。無所得。乃開扃徧索于外。得之西圃池亭之側。坐以胡牀。而耳目鼻口。悉爲泥塞。急扶掖洗剔去之。則

已昏然不知人矣。昇歸灌沃湯藥。移時竟死。其宅牆垣四周。而中門扁鎖。則不通內外。不知何從而出也。時傳其地墓故漏澤園也。宣政間何決。湍流橫潰。不復可塞。有河清卒牢吉。往來壞堰之傍。相視塞河之策。忽聞有呼其姓名者。至於三四。比近聞無人。尋呼聲出葭葦間。迫視。乃一大蝦蟆。蹲高如人。異而拜之。蟆問爾數往來何爲者。對以河決不可塞之狀。蟆卽吐一物。舉蟠承之。狀如生離支。以與吉曰。吞此可沒水七日。卽能窮堰決之源。或有所覩。切勿驚也。且授以沉置菱礎之法。云堰成須廟以鎮之。吉拜謝。忽失蟆所在。自此遂善沒水。深行河底。見決處下有龍。方熟寐。出如蟆所教。河決迄塞。而建廟焉。李知縣昭明仲說

許式字叔矜。赴調京師。歸行由汴岸。舟有呼許侍郎者。直詣式舟。式

日誤矣。某小官也。其人笑曰。君卽是矣。某與君有先契。聞君將歸。故欲一見。因探懷出物一襲。曰。以此贈行。異日得十四歲女子乳。卽可餌也。許大訝。且奇之。徐發得白石數塊。堅瑩可愛。因緘藏之。是後凡曆數任。得倅博州。一日行縣還。太守謂曰。近一事異甚。民家一小女。不夫而孕。父母弗能堪。今在禁矣。而情未得也。許曰。其年幾何。曰。十四歲矣。許忽憶曩事。特詰問之。女子涕泣曰。實無宅。但一日嘗浣衣溪傍。南岸忽有人呼某小字者。誤應之。乃一道者。熟視都無一語徑去。方應聲間。忽若有感。自爾成孕。初不知其所自也。許因訪道者容狀衣服。卽汴岸所見者也。大神其事。令人謹養視女子。及產子。取乳以磨所藏之石。應手如膏。因卽餌之。經月餌盡。乳卽止。而子死。召其父母。告以實而釋之。其後果登禁。從享

睽車志 卷三

年八十。容色童潤。如少壯時云。鄉人說蔡津

睽車志卷四

宋 郭彖 撰

姚大夫安禮。嘗暮宿驛舍。僕輩各已休寢。時夏夜盛熱。不得寐。獨起散步屏後。聞庭下簌簌有聲。隙屏窺之。正見一叟。幡然素衣頂冠。長纒尺許。策杖緩行。仰首視月。以手加額。姚初意其神物。屏息不敢驚。俄一蟻。飛過其前。叟卽舉杖。一擊墮地。俯而裂食之。姚乃拔劍逐之。轉過廳側廊廡後。走入鬱樓而滅。插劍識之。明旦命僕發視。得一白蟬甚大。傍有故鐵托火筋各一。蓋其冠杖也。乃殺之。驛舍舊多怪。自此遂絕。

陳襄仲謨
說二事

張無盡之子龍圖公。家于義興郭外。有故遣僕入邑。舟行數里。日將

沒見一婦人行岸上。手挈油罌。迎舟而過。僕熟視。卽家故婢招喜也。名呼之不應。去愈疾。停舟追及之。方悟其已死。因問爾今安在。婦人遠指岸側一古木曰。吾居是間。復問須油安用。曰。吾遍體創裂。藉此膏潤。則痛少差耳。且謂僕郭門外精舍老僧。戒行嚴潔。惟日誦金光明經。爲吾求誦十部。以資冥福。當卽往生。僕如其言。訪僧誦經。還過其處。擊木呼之。俄有白衣叟。出水穴中。曰。招喜得經。已受生矣。煩再爲吾誦十部。僕方問其何人。忽不復見。他日復訪僧誦經。但以木中老人回向云。

宋左藏硯。嘗言家故澤州。有第宅。園圃牆角有古塚。因治地發之。得一石誌。題曰。郡守李公之墓。壘石爲藏。棺中朽骨一具。無它物。而棺之側。斲石爲乳婢。抱哺一嬰兒。不知其何爲也。

士人李陽錫。嘗得疾。惟脊骨間痛不可忍。百藥攻治不效。若此數十年後。因改葬其父。易棺遷其骸。脊骨節間有大白蟲。乃撥去之。自

此脊痛頓愈。

吳大任
承務說

宗室趙白瑄。居明州小溪。游俠尙氣。建第宅甚雄。嘗暮行溪濱。見有物自其宅門出。乃一熏籠自行。蹒跚勃率。徐過其前。驚顧之間。乃疾行入水而沒。俄而伯瑄死。

張漢卿
省幹說

常州華嚴寺僧道良。爲知庫數年。多所乾沒。忽臥病危憊。長老道素。夜夢良來云。且往近庄養疾去。逮曉則報良已卒。俄近庄報牛夜產犢。而病一目。良素眇。皆驚訝。他日道素按視近庄。取犢視之。見素淚下。素謂曰。汝知庫耶。業報如此。當隨吾還寺。牽磴作麵。供衆以償宿負。犢卽隨肩輿以行。不待驅逐。既至寺。日作麵兩石。有常

課主者竊增其數。犢至常課卽止。驅之竟不行。或呼知庫良公撫勞之。則淚下有僮行。斥良名罵之曰。盜常住賊。則怒目奔觸。人力不能制。素令日以僧食啖之。酸齏至頓食五十枚。僧從簡言親見其事。

紹興辛未歲。四明有巨商。泛海行十餘日。抵一山下。連日風濤不能前。商登岸閑步。絕無居人。一徑極高峻。乃攀躡而登。至絕頂。有梵宮焉。彩碧輪奐。金書榜額。字不可識。商人游其間。闐然無人。惟丈室一僧。獨坐禪榻。商前作禮。僧起卽坐。商曰。舟久阻風。欲飯僧五百。以祈福祐。僧曰。諾。期以明日。商乃還舟。如期造焉。僧堂之履已滿矣。蓋不知其所從來也。齋畢。僧引入小軒。焚香淪茗。視窗外竹數筒。幹葉如丹。商堅求一二竿。曰。其持歸中國。爲偉異之觀。僧自

起。斬一根與之。商持還。卽得便風。就舟中。裁欲竹爲杖。每以刀鏤削。輒隨刃有光。益異之。前至一國。偶携其杖登岸。有老叟見之。驚曰。君何自得之。請易以簞珠。商貪其賂而與焉。叟曰。君親至普陀落伽山。此觀音坐後。旃檀林紫竹也。商始驚悔。歸舟中。取削葉餘枝。室藏之。有久病醫藥無効者。取枝煎湯飲之。輒愈。

程仲謨
知錄說

程泳之沂。爲平江崑山宰。秩滿。其弟鉅爲府監倉。乃攜其家就居焉。一日泳之方與妻對食。忽有髑髏。自空墮几案間。舉家驚愕。泳之爲祭文而埋之。不數日。泳之妻病。日寢加劇。一夕爲鬼所憑。下語云。我李貫也。爾先爲吾妻。酷妬特甚。三婢懷妊。皆手殺之。今使吾無後。職汝之由。吾旣死。資財且多。曾不爲吾廣作佛事。以伸薦悼。乃盡奄有。爲再嫁資。吾已訟于陰府。不汝置也。妻遂冥然。有道士

善治鬼。使視之。道士取幅紙密咒。展示童子。童子佈曰。正見一庭下。有人袍笏而立。傍有三婦人。皆被髮流血。庭中摔一婦人。鞭之甚楚。程視之果然。遭鞭者乃其妻也。道士曰。此已爲陰府所逮。疾不可爲也。程懇其徒。欲其少蘇而訣。道士復作法。書篆文焚之。童子復視。則曰。鞭者已停箠矣。程亟入視其妻。果漸蘇醒能言。問之。乃言前嫁爲李貫妻。實嘗殺婢。故爲所訴。乃囑程集篋中某物。皆貫故物也。可貨以飯僧。已而竟卒。

陳暨食
鉅說

有士人寓述三衢佛寺。忽有女子。夜入其室。詢其所從來。輒云所居在近。詰其姓氏。卽不答。且云。相慕而來。何乃見疑。士人惑之。自此比夜而至。第詰之。終不言。居月餘。士人復詰之。女子乃曰。方將自陳。君宜勿訝。我實非人。然亦非鬼也。乃數政前郡倅馬公之第幾

女。小字絢娘。死于公廨。叢塗于此。卽君所居之隣。空室是也。然將還生。得接燕寢之久。今體已甦矣。君可具斤鍤。夜密發棺。我自于中相助。然棺旣開。則不復能施力矣。當惜然如熟寐。君但逼耳。連呼我小字及行第。當微開目。卽擁致臥榻。飲之醇酒。令放安寢。旣寤。卽復生矣。君能相從。再生之日。君之賜也。誓終身奉箕箒。士人如其言。果再生之。曰。此不可居矣。脫金握臂。俾士人辨裝。與俱遁去。轉徙湖湘間數年。生二子。其後馬倅來視。遷葬此女。視殯有損棺。空無物。大驚。聞官盡逮寺僧鞠之。莫知所以。馬亦疑若爲盜發。取金帛。則不應失其屍。有一僧默念數歲前。士人隣居久之。不告而去。物色訪之。得之湖湘間。士人先子然。復疑其有妻子。問其所娶。則云馬氏女也。因逮士人。問得妻之由。女曰。可併以我書寄父。

業已委身從人。惟父母勿念。父得書。真其亡女草札。遣老僕往視。女出與語。問家人良苦。無一遺悞。士人略述本末。而隱其發棺一事。馬亦惡其涉怪。不復終詰。亦忌見其女。第遣人問勞之而已。

承連德廣
說二事

待制盧知原。知某州日。有軍卒妻生子。未週歲而死。既殮葬。輒夜歸乳其子。卒與語。則不應。復謂之曰。死生異路。生兒飲亡者乳。恐不相益。亦不應如是。此夜而至。卒懼且疑曰。是未必果亡。妻或鬼物所爲。不去必害此兒。乃密置刃席下。是夜復至。舉刃逆之。應手而滅。明旦卒臥未起。有扣門者。出應。乃捕吏。卽執之曰。爾殺人。視血蹤。自藏尋之。直至妻墓。有屍伏于冢上。其腰受刃。流血而踣。卒辭實不殺人。視屍狀貌衣服。宛然亡妻也。因自述其事。隣里爲証。妻

實病死。葬且多日。乃發冢驗之。棺空無物。待制之子連。親爲予言之。且云此獄。適當盧公罷州之際。竟不知後政。何以決之。

蘇州崑山慧聚寺。僧如遠善醫。多受謝遺致富。而不守戒律。一日遇寒食節。邑人陳監倉裏。作裹蒸百枚。分半饋之。遠發器食。解包盡

成泥塊。俄而遠卒。

陳仲謨說

蜀道多山鬼。有小吏遠。逐憲車。同行數人。日將暮。見道傍一婦人。携汲器。立溪側。小吏就丐飲。且挑狎之。婦人初無難色。談笑而道之。吏引手捫其胸臆間。皆青毛長數寸。冷如水。吏驚呼而走。婦人大笑。挈汲器。徐步而去。

李仲明云司馬端行說

辛未趙榜。有進士魯璫。省試納卷畢。將出門。偶思省題詩。誤押旁韻。倉皇反走。五幕求之。時卷軸混淆。積人語喧哄。決謂不可檢尋。

歎恨憂沮。適一老吏。問其故。曰。吾能爲公取之。璫賂鐵二十千。吏卽入幕。於亂卷中。一探得之。以授璫。乃塗竄其誤。吏囑曰。謝鐵。幸爲送吳山坊某人家。卽我家也。璫喜謝而去。越三日。往訪其家。則云某人者。故大常吏人。死已旬日矣。詢其狀貌。正貢院所見者也。璫驚暗。因語其故。且感其德。以鐵付其家。已而登第。

建炎間。泉州有人泛海。值惡風。漂至一島。其徒數人登岸。但見花草甚芳美。初無路徑。行入一大林。有溪限其前。水石清淺。衆皆揭涉。得一徑。入犬山谷間。俄見長人數十。身皆丈餘。耳垂至腹。卽前擒數人者。每兩手各挈一人。提携而去。至山谷深處。舉大鐵籠罩之。長人當一人看守。倦卽臥石上。捲其耳爲枕焉。時揭罩取一人。褫去其衣。衆共裂食之。內一人。竊於罩下。壞土爲窟。每守者睡熟。卽

極力掘之。穴透得逸走。至海濱。值番舶得還。言其事。莫知其何所也。

武康鄭丞
咸平老說

湖州武康監稅周光。以職事被檄入府。館於一寺之僧堂。每夜常見聖僧像前。鼠盜其供物果實之類。入於像座之下。一日乘闕於座下尋之。則鼠乃聚故碎經紙爲窠。內有新生鼠四枚。皆無足。宛轉啾啾然。蓋毀經盜果之報也。

崑山慧聚寺山壘中。有開山誓大師石像。前有二石虎。一夕忽失其一。他日有人見於常熟虞山中。石重非可倉卒徙置。不識何物。憑依爲怪耳。

金陵舟稍李某者。其妻言有一姊。平日惟誦金剛經。死十餘年。近其夫家。欲火其骨。啟殯。朽化都盡。惟其肝心。宛然獨存於白骨間。略

無損敗。既火化。愈堅如臘然。蓋誦經之驗也。

建炎間。術者周生。觀人書字。分配筆畫。以知休咎。車駕自明駐杭時。虜騎驚擾之餘。人心危疑。執政戲呼周生。偶書杭字示之。周曰。懼有警報。虜騎將逼。乃拆其字。以右邊一點。配木爲朮。下卽爲兀。不旬日。果傳兀朮南侵。趙相秦樞。廟謨不協。各欲引退。二公各書艮字示之。周曰。趙公卽去。秦必留。日者君象。趙書退字。人去日遠。秦書人字。密附日下。日字左筆下連。而人字左筆斜貫之。蹤跡固矣。欲退得乎。既而果驗。

吉州民家。有畫入定觀音像。供事甚謹。一日像忽開目。其家初疑兒童爲戲。明日視之。復閉如初。方大驚異。後數日。其家一僕。忽自經於佛堂。

黃知縣童
士季說

紹興壬午歲。海陵有貨藥者。牽一牛。臂腔間生一人面。耳目口鼻皆具。傍出一人手。如嬰兒臂。外兄胡元常親見之。

峽江水中。有物頭似狻猊。而無足。自頸以下。扁闊如疋練。粘涎如膠。喜食馬。土人謂之馬皮婆。有浴馬於江者。輒伺無人。揭舉其尾。覆罩馬背腹間。曳之入水。土人或繫馬於岸。其物擲尾罩之。馬繫不得去。而其物膠不得脫。則捕而殺之。李昭明仲說

章思文。福唐人。家世貧窶。思文以鈎距心計致富。初一武臣。忘其名。監秀州華亭縣鹽場。貪污不法。多受亭戶賄賂。任思文以爲肘臂。約所得中分之。武臣者。以方在任。欲匿其迹。故受賂多。寄思文所。信之不疑也。秩滿受代。乃從而取之。思文盡乾沒不與。武臣者。不勝憤恨。致疾以死。思文暮年。始生一子。鍾愛之。而其子幼則多病。治

療之費。竭產不恤。年六七歲竟死。思文慟悼。恨不身代之也。蓋棺之際。痛不能捨。復舉而累撫之。則其子面已變如向武臣之狀。盛怒勃然。懼而亟瘞之。趙謙之司戶說

成都楊道人。本坊正也。素嗜酒。無行。遭杖罰者屢矣。嘗於市肆遇異人。風采秀聳。楊日與之飲。凡日所得。悉爲飲費。久之。異人曰。能從我遊乎。然子有妻子之累如何。楊曰。棄此直差易耳。歸則手書與妻訣。仍尋配嫁之。一子數歲。以予人。他日復遇異人。則曰。累已遣矣。因自述其詳。異人曰。誠然乎。當隨我所之。楊敬諾從之。復痛飲酒壚。日暮。乃於將出城。是夜月明如晝。異人前行。相去常百步。初如行十餘里。乃下路。望大山林蔚茂處。漸行草莽中。又數里。楊覺履地甚濕。繼而水沒足。乃大聲呼曰。迷路入水矣。異人曰。第前無

善也。楊復前。水寢深。又行一二里。則沒膝及股。而異人前行。無異平地也。乃解衣深涉。水及腹。俄及胸臆。楊猶進不已。則水已承頤。乃復大呼。以水深不可進。異人喑曰。惜哉。子未可往也。恍惚間。如夢覺。乃身在城壕橋上。異人亦在其傍。卽於橋下。取一小鐵鐺。及於腰間。解一皮篋贈之曰。子緣未至。乃長揖而去。追之數百步。忽不見。楊自是發狂。或悲或喜。語言無倫。如病心人。徃徃預言人休咎。學道者從之寢多。每月八日。輒於貧丐者。自府治之前。分坐通衢兩邊。直抵城門。楊以鑊煮粥。令其徒舁以自隨。躬以杓盛粥。給丐者。仍於皮篋中。取錢與之。人二十文。丐者率數百人。而所給常足。李修撰任四川都漕。治所在成都。常邀相見。敬待之。子弟輩與之狎。或戲匿其篋。楊索之不得而去。度明當施貧。乃來求取甚力。

既得。欣欣然置腰間。以手撫之。錢已滿矣。身衣敝衲。或贈以新衣。卽服之。顧視喜笑。仍收其故衲。或求之不與。明日視之。敝衲如故。新衣隨卽施於貧者盡矣。一日謁李時。方獨坐後圃之舫齋。楊視左右無人。曰。吾餉使君一物。卽作嘔噦之狀。鼻涕涎沫交下。吐出一物。以掌承之。明徹如冰玉。令李吞之。李有難色。遲疑間。楊卽復自吞之。跳入齋前池中。大呼殺人數聲。李命左右扶去。不數月而李卒。又有寇先生者。有道之士。李亦招接之。一日寇自山居。詣城謁李。適出赴府會。子弟請坐書室。寇忽問曰。運使每出赴公會。宅廚亦破食料否。子弟曰。然。寇曰。某來特報一事。近至冥府。視運使食簿無幾。宜極裁節。子弟初不之信。未幾而李果卒。二事殿撰之孫明仲。親爲予言。又云。是時復有席子先生者。不知其何許人。

亦莫詳其姓氏。蓬頭垢面。以一席裹身。伏於官道之側。以食與之。卽伸首取食。必盡數。日不與食。亦不飢。所處不復移徙。未常見其溲便。蓋亦異人也。李昉仲言四事

宣和間。沂密有優人。持二子。號曰胡孩兒。年各六七歲。童首而長鬣。所至觀者如堵。自云。其婦孿生此二兒。生而有髭。亦不知優人所自來。後失所在。尋而胡醜亂華。蓋人妖也。

逆亮末年。自製尖靴。頭極長銳。云便於取鞢。而足指所不及。謂之不
到頭。又爲短鞭。僅存其半。謂之沒下鞞。其後渝盟犯順。果爲其下
所叛。死於江上。

駿車志 卷四

十八

駿車志卷四終

陔車志卷五

宋 郭彖 撰

李尙書儵。居密州城東都曹之舊廨。素傳多怪。空不敢居。李初得之。未徙居間。一日有鬻冠珥者。過其後門。見數婦人。各買冠珥以入。鬻者意李之後房。待其取直。久立門側。聞不復出。轉至大門詢之。則扁鑷甚嚴。見守舍卒。告之故。卒曰。空宅耳。乃與啟關入視。則冠珥之屬。或列置竈上。或懸掛壁間。李既入居。一夕獨坐書室。張燈觀書。令滿注膏油。俾僕各休寢。夜分燈缸忽無故自墜。覆書冊上。李亟呼燭視之。缸正安几上。油膏如故。無涓滴沾污。乳母携小兒戲。便坐堦側。有竹簾滿貯石灰。小兒至簾所。大驚呼乳母走從之。

云適見一小人立灰中。面甚醜怪。他日視土地祠中木偶。小兒指曰。此卽前日灰中所見也。李後修治其屋。開通屏障。撤屋瓦改覆。每瓦溝下。寘細書天童神咒一軸。以厭之。怪不復見。

李通判者。忘其名。一女旣笄。遴擇佳婿。久未有可意者。一日有陳察推者。通謁與李有舊。叙話甚欵。因言近喪偶。且及期矣。言及歔歔流涕。且言家有二女。皆已及嫁。思念逝者。悲不自勝。李女自青瑣間窺之。竊謂侍婢曰。是人篤於情義。如是決非輕薄者。得爲之配者亦幸矣。因再三詢其姓氏。每言輒及之。陳時年逾強仕。瘠黑而多髯。容狀塵垢。素好學能詩。妙書札。李喜之。每歎曰。使其年貌稍稱吾女。亦足婿矣。女聞之。竊謂傳姆曰。女子託身。惟擇所歸。年之長少。貌之美醜。豈論也哉。由是家人頗識女意。媒議他姻。則默不

樂。父母怪之。曰。豈宿緣耶。乃遣媒通約。陳初固拒。以年長非偶。其議屢格。則女輒憂憤。或慍不食。父母憂之。固請。不得已。乃委禽焉。女喜甚。既成婚。伉儷和鳴。撫陳之二女。如己所生。謂陳曰。女已長。婚對將及時。不宜緩也。朝夕屢以爲言。且廣詢媒妁。不半載而嫁其長女。傾貲奉之。陳以季女。尙可二三年。妻曰不然。趣之猶力。陳辭曰。縱得壻。今無以備奩具。妻曰。第求壻。吾爲營辦。又數月。亦受幣。亟議嫁遣。陳曰。奈何。妻忽謂陳曰。君昔貯金床下。盍取用之。豈於已女而有吝耶。陳大驚曰。汝何從知之。但笑而不言。蓋陳實嘗埋金。他人無知者。因取用之。不期年而二女皆出適。妻謂陳曰。吾責已塞。今無餘事矣。當置酒相賀。乃與陳對飲。極量。懽甚。各大醉而寢。翌旦醒覺。妻忽驚遽。大叫曰。此何所耶。顧陳曰。爾何人也。陳

大驚。疑其心疾。媵侍輩圍守。妻驚恐惶惑。問曰。我何爲在此。媵侍曰。夫人成親一年。豈不省耶。妻都不曉。俄其父母至。撫慰之。因歷言其本末。妻大慟曰。父母生我。不爲擇配。此人醜老可惡。忍以我棄之耶。不肯留。乃送其家。自言恍如夢覺。前事皆不知之。陳亦悟埋金之事。惟其亡妻知之。疑其繫念二女。而魂附李女。以畢姻嫁也。後竟此離而改醮焉。異哉。王敬授伯廣師德言

李允升。字子猷。毘陵人。紹興甲戌歲登第。再調官。知建康府上元縣。方待闕次。一日家居。燕坐書室。忽見黃衣。聲喏於庭下云。齋到勅牒。李驚曰。吾新任勅牒。久已取至。豈復有此。黃衣人卽探懷取一黃牒授之。乃大署曰。李某可充荊陽坊土地。李方以自有新任。辨爭間。則已有人從。羅列庭下。黃衣人曰。必未欲赴。須白之城隍。乃

扶上馬。徑詣城隍祠。亦以新任自理。神曰。天符不可違。可自署狀。願新任滿日赴上。從之。神命送之還。將出。見里人張某者。荷械於廡下。李悟其已死。前問其良苦。張曰。煩歸謂吾兒。吾嘗於某年月日。發心作一醮事。手疏釘置梁拱間。人無知者。令爲我償此心願。生至家。從者乃聲喏辭去。恍然身乃坐胡床上。歷歷記其事。似夢非夢。家人皆不覩其他。但見其咄咄獨語。復舉手如握筆書字狀。因詣張氏。道其所見。其家如言索之。果得張手疏。宛然不差。李後到任。坐罪流嶺南。竟未曉荆陽之說。

蜀人孫思文。美風姿。每自負其標韻。娶妻姝麗。伉儷之間。相得歡甚。一日偕詣神祠縱觀。思文指神像謂妻曰。彼熟與我美。妻曰。卿似勝也。夜歸。思文夢神召責之。叱令換其面。卽有數鬼。捽至一處。見

若假面數十。取其間頷頤蹙額大醜者。割去面而易之。驚呼而寤。以手捫面。覺有異。呼燭視之。果然。妻卽佈死。孫大悔恨而已。

臨川屠者張某。晚年頗悔其業。自以宰殺物命至多。必受惡報。又其體至豐肥。乃日誦佛號數百聲。畫佛像瞻禮。惟祈命終之日。不值暑熱。人皆笑之。如是積十數年。忽盛夏死。其家素貧。無以棺斂。人謂必臭潰矣。俄天大雨。停屍破屋之下。漏下如注。遍濕其體。經夕悉凝爲冰。凡停三日。畧無變動。鄰里爲營葬之。魏良佐通判說二事

表弟魏良佐。嘗自長沙逆婦折氏。還三衢。未至家十里。暮夜不能前。泊舟溪岸。中夜月色如晝。舟人皆寢。聞舳尾拍浮之聲。疑其盜也。起視。見一人援楫欲上。操篙擊之。其人釋楫而罵。語音嘲哲不可曉。始懼其爲鬼物。倉猝移舟避之。隨舟而罵。聲益厲。中流極深。而

其人常出半身於水面。且行且罵。二三里。去舟益遠。乃默無聲。諦視流乃屍也。至家未久。而折氏病卒。

福州郡治。王審知故宮也。便坐極雄麗。郡守至者。莫敢升。稍涉庭堦。

卽有文身見於梁間。郡人或傳。昔嘗有郡守

失其名

不之信。至卽視

事於便坐。須臾。有叱聲出於屏間。守謂曰。吾以朝命守此。便坐吾所宜居。鬼物若何擾人。應曰。吾居此久矣。累政皆見避。公何獨見逼耶。守叱之。鬼曰。吾不汝校。當有與汝抗者。守不以爲然。自是比日升便坐。旬餘。守方據案。有卒被酒。挺刃突闥而入。刺守殺之。左右亦殺卒。噫。是果審知之神乎。將卒以酒而狂易。適與神之言會乎。抑守之命固及此。而神因藉以爲靈乎。夫用物精多。則魂魄強。是以有精爽。則神或有之矣。然郡守而視事於便坐正也。鬼而亂

人之居非正也。以非正而害正。不爲濫誅乎。昭昭在上。有又聽而弗問乎。或者以審知故國。天假有靈。使有所歸。則廟食足矣。奚至奸亂於人如此乎。昔吳興郡於廳事爲神坐。以祀項羽。號憤王。甚靈響。前後二千石。皆於廳拜。祠以軛下牛。而避居他室。及蕭爲喻彥太守。著履登廳事。果聞室中有叱聲。彥喻厲色曰。生不能與漢祖爭中原。據此廳事何也。因遷之於廟。而廢搥牛之祀。竟亦無他異。而視審知。固不可同日道。至其爲鬼。亦不若項羽之服義也。

紹興間。一郎官不欲言其姓字。踈蕩不檢。一朝士與之善。朝士家有數妓。容至。必出以侑酒。郎官者與一妓私相悅慕。而未得間。一日郎官折簡寄妓。與爲私約。朝士適見之。妓不敢隱具。言其故。朝士曰。然則非爾之過。當爲爾輩爲一笑資。姑答簡與之。期以來夕。密

會於西廂。且云主人者。適有故之城外。越日乃歸。此機不可失。郎
得簡。喜不自勝。如期赴之。妓先已待於會所。引入屏後曲房。妓
先登榻垂幔。命郎官解衣而登。暨前褰幔。則妓已自榻後潛去。朝
士者。方偃臥榻上。瞠目視之。郎官羸露。惶遽欲走。則門已閉。朝士
謾爲好辭。諛之曰。與公厚善。何爲如此。妓女鄙陋。不足奉君子之
歡。已遣歸矣。惟公勿訝。徐起復曰。某家使令稍衆。不略相懲。彼將
觀望。無所畏憚。乃呼羣僕。掖之於柱。以巨竹挺。撻之二十。流血及
髀。呼服謝罪。復謂曰。與公素善。故不欲聞官薄。示庭訓。亦不泄於
宅人也。乃遣出。亦不與衣。其人狼狽遁還。明日朝路仍復相見如
故云。

慮德
廣說

無爲有陳氏。家貲累百巨萬。而主人者。貌甚寢陋。時謂之陳獼猴。起

宅於郡治之西南。頗華壯而多怪。紹興改元。大盜焚劫之餘。觸目荆棘。有賈知丞和伯。借其宅居之。堂後地形隆高。夏夜納涼。忽聞絲竹之聲甚微。而清遠可聽。屬耳久之。乃在地中。疑古塚也。

平江陸大郎者。家頗富厚。有別業在平山。一庵僧與之素善。僧所置產業。率皆寄陸戶內。既久。陸遂萌乾沒之心。僧索之不與。乃訟之官。陸多推金錢賂胥輩。僧不得直。反坐誣詐。僧不勝忿恨。乃日焚香。望陸門而拜。且禱願爲其子。取償所負。久之僧死。逾年而陸生子。以年長始立嗣。鍾愛之。號曰小大郎。稍長。游蕩不檢。家資爲耗。陸不之禁也。及陸死。小大郎者。奉葬甚厚。是後妄費益侈。不數年。財產蕩盡。無以爲計。乃伐墓木以易斗升。既童其山。則又託言風水不利。發取其棺。及瓮甓之屬。盡賣之。焚其骨。棄燼湖中。人皆謂

小大郎卽僧後身。蓋伐木焚屍之酷。非至讎不忍爲也。今世之不肖子。以貧故。若小大郎所爲者多矣。是雖名爲子孫。安知非宿世冤憎願力之重。假託以償其忿耶。但業緣所牽。一經歌羅邏位。則不復自知耳。鄭光錫 邵承說

游學士醉捐館。棺際舍利湧出。靈座亦有之。其邑封蕪香祝之曰。性相空寂。況此幻身。本來無有。既到這裏。莫作野狐精魅。俄而舍利

皆不見。表兄魏守 高佐說

士人鄭鑑虛中。假玉還僧舍。教授生徒。居久之。日覺瘦悴。友人訪之。見其露臂。膚革虛黃。如蟬蛻然。怪而問之。虛中恍惚若譫語者曰。居妻家亦頗樂。偶自瘦耳。虛中初無室家。友人疑其妖魅所感。驚謂之曰。君未嘗娶。何者爲妻家。得無妄想耶。虛中遽若省悟。但唯

唯愧謝而已。是夜卽得疾。繼而殂。寺僧云。所其寓室。有數政前兵官子婦之棺。座其下。而鄭初不之知也。他日兵官之家。發取其殯。棺壞易之。見其屍初不朽。而自腰腹以下。肌肉如生人。始悟虛中。

蓋與之遇也。

何庇縣尉說

朱藻字元章。徽人。某年南宮奏名。方待廷試。有士人同寓旅邸。士人便服。日至瓦市觀優。有鄰坐者。士人語語頗狎。因問其姓字鄉里。皆與元章同。士人訝之。又云。某幸已過省。而不得及第。今且欲部中注授差遣。士人益怪之。未及祥詰。適優者散。場觀者闐然而出。士人與鄰坐者。亦起出門。將邀就茶肆與語。而稠人中。遂相失。士人歸邸。與朱言共。及拊掌笑其妄人。以朱登科。故冒其名字也。頃之庭對。而朱以犯諱。降學究出身。且就部闕。因追憶曩者。士人所

遇蓋鬼也。益知科名。無非前定。司農及寺丞躬明說

秦奎爲鄂州都統司幹官。嘗於長安買一妾歸。居數年。生一男。其妻嘗以事怒之。過勝。妾不甚忿。厲聲曰。我非人也。何乃苦見凌逼。妻叱之曰。汝非人是何物。妾卽應曰。我乃鬼耳。忽變其形長大。容質不異。而穎抵屋極。舉家駭愕。已復如故。詰問之。終不言其所以。其家以其子慕戀之故。亦不遣之。今猶在其家。周師禹佐藏說

曹滋字仲益。嘗以幹至衢州江山縣。縣有江郎廟。滋聞其靈響。往拜謁焉。廟有二女像甚美。俗傳江郎之女。滋心悅慕。注視甚久。見一像。若動目相盼者。驚懼而還。夜夢其女來與之偶。久益狎。徃徃暮夜。不夢而至。間與滋論文。多所啟發。俄而滋苦羸疾。其家命道士作法驅之。女怒曰。相慕而來。非有不利於子。何乃見逐。吾不可復

留此。會曹亦將行。送之出州境。泣別而去。

七舍鄭稱說

靳瑤者丹陽牙校。嘗得譴。避地維揚。與其妻偕謁后土祠。甫贍禮間。妻遽得心痛。寢劇不省人。與歸卽死。郡人素傳有五通神。依后土祠爲祟。瑤不勝哀憤。旣歛。火化畢事。卽具羊酒。詣城隍廟。禱且訟。翌日暮歸。還經后土祠東空曠處。見婦人獨行漸近。乃其妻也。相持悲慟。妻曰。我感君掛念之恩。且有憾焉。君旣訟於神。神俾我還。旣被焚。乃無所依。君若不忘平生伉儷之情。當爲至懇。萬一再生。瑤請其故。妻曰。城南十五里外。有茅君者。有道術。君徃求焉。言訖而隱。瑤詰朝走城南。訪茅君。果得於村巷中。茅簷荆扉。教授村童十數人。瑤前拜之。茅起遜謝。再四不已。茅問來意。瑤具陳其故。茅初笑曰。此何等事而告我。拒之甚力。繼之以怒。瑤懇益勤。茅默然。

良久。曰。君眞篤於伉儷者。姑以事狀來。瑤已素備。卽探懷出狀。茅覽之。就其書几。取筆連書數十字。類隸草。淡墨欹橫。茫然不可曉。語瑤曰。持此北去十里。所有林木神祠。扣扉當有應者。卽以授之。瑤如其言。至則茂林陰翳。廟極邃深。森然可畏。勉扣其扉。有青衣童出。受書而入。俄頃復出。斬竹一根。囑瑤曰。騎此但閉目東行。當有所覩。瑤跨竹去。如駛馬。時竊開目。則竹止不行。所向皆荆棘。復閉目。則又迅馳。久之。忽覺自止。開目。乃見粉垣華居。若王侯居第。有人引瑤入。指東廡下小門。令瑤入觀。迴廊四合中。有婦女。或笄或卵。以百數。而妻在焉。近語瑤曰。感君之力。今冥官許借體還生。城東有朱氏。年十八九。某日當死。我之精魄。徑投其體。則再生矣。然彼身則朱氏女也。君當往求婚。冥數如此。必可再合也。復遽曰。

君不宜久。此送瑤。廡門。瑤出門亦隨閉。迴視殿堂。皆神物想像。亟趨出門。所乘竹故在。倉卒復跨之。瞑目。覺去愈疾。如行三里所。忽若馬蹶墮地。驚顧乃在城濠側。已昏暗。嚴鼓後矣。褰及揭水。攀堦垣以入。至其日。訪城東朱氏。聞其女病甚。瑤固已疑。徊翔鄰近。至午後。聞其家哭聲甚哀。移頃。哭聲遽止。詢之曰。女復蘇矣。瑤怪其事頗驗。暨復訪茅君。則室已虛矣。自是暇日。時一至城東。密訪其鄰。皆云朱氏女自還魂。神識不復如舊。至不識其父母兄弟。但口時問靳瑤何在。瑤因託媒氏通意。父母聞瑤姓名。已駭愕。遽入謂女曰。靳瑤今來議汝婚矣。女曰。此我夫也。自此口不言靳瑤。其家竟以歸之。宅日瑤從容訪以朱女及其故妻前事。皆懵然不省云。

新廣州李
可理箴說

毘陵薛季成元功。紹興乙卯登科。再爲邑令。不能脫選。時意倦遊。乃請於朝以歸。命下。以通直郎致仕。未幾病卒。無子。其姪爲主後事。且錄致仕告身。寘之棺。倉卒間。誤書左字爲右。其姪亦不之審也。居無何。夢爲人逮至一官府。季成據案坐。作色數之曰。吾平生讀書。僅得一官。自謂不負筆研。今乃誣吾進非科第。使吾愧見同列。奈何。命左右挺之數十。姪惘然。夢中憶昨誤。乃再三引咎。季成色稍霽。叱令改正。乃釋之使去。姪既醒。別書告焚之。後不復夢。人疑其爲神云。費堯承務說三事

晉陵丁端叔連。乾道初元。赴鄉舉。未試前數日。夢人授以勅牒。視其文曰。鄉貢進士丁可留云。端叔既寤。私喜欲易名可留。又念語不雅馴。乃止。既試畢。考官丁可者。見一試卷。絕愛之。以病先出院。屬

同考官。必令寘之前列。及發封。乃端叔也。始悟丁可留之證。竟以是舉登科。

錫山許宗美琮。紹興己卯。隨計吏試禮部。與同舍禱於太一宮。默以所見爲得失之讖。觸目一碑云。竺落黃茄天。宗美以犯落字。大惡之。是歲果被黜。後入太學爲諸生。以壽皇登極。恩赴省。復詣宮。如前禱焉。禱已。周行廊廡間。才舉足。則見二神位。云河魁從魁。宗美甚喜而出。消南宮揭榜。何自然爲省元。而宗美以詩賦魁前場。蓋讖二魁之姓名云。

睽車志卷六

宋 郭象 撰

鹽官上管場亭戶鄔守興。紹興十八年夏旱。田苗皆槁。鄰人相率訴於縣官以免稅。守興曰。吾聞旱乾而投訴。卽是訴天。且吾家二稅。並是折鹽。何用訴爲。乃獨不預名。明年夏復大旱。一鄉盡成枯槁。惟守興田。時時得雨。是歲獨稔。收倍常年。曹元裕省幹說

成忠郎張珏。靖康間。隸禁旅。都城失守。衆潰爲盜。常過金州一山寺。緇徒皆已竄避。乃聞一僧房後。婦人笑語聲。怪而尋之。乃大地蟠結數堆。驚視之際。俄失所在。知光州趙謙之說四事

邵彪大夫未第前。夢黃衣人持春榜來。欣然取視。榜背乃有已姓名。

而下注一龍字。寤而自解。謂必應龍首之選。來春登第。乃在行間。餘年而耳聾。始悟龍者。謂聾也。

宣和間。元而州西酒樓。一道人來。索酒痛飲。初不自錢。將去。取筆題詩壁間。偶到皇都。翫月華。笙歌留我醉流霞。勸君不用悲塵世。天上人間咫尺家。乃探懷取藥匕許。拭杯卽成黃金。以償酒直。明日譁傳都下。禁中聞之。以銀十兩。易其杯去。

奉直大夫錢璘。乾道丙戌。任臨安倅。嘗夢一偉丈夫。黃衣冠曰。吾土宿也。熟視錢久之。曰。一軍足矣。覺言其夢。謂當得軍壘。俄而病卒。初錢再娶張氏悍妬。且不事事。傾橐嫁其二女。家貲蕩盡。至不能葬。時葉夢錫丞相。奉使餉君朱方。其子說之。詣葉告急。乃俾部無爲軍錢綱。得水腳資數百千。以畢葬事。始驗一軍之說。

呂仲發顯謨。宰吉安日。縣圃有大杏一株。十月間。忽開花四朶。全是
薔薇。殊不類杏。自是呂從劉恭甫樞密之辟。不逾年。凡四遷秩。亦
花之瑞也。仲發
自說

平江凌知縣。建宅桑林巷。頗壯麗。而多怪。門戶時自開闔。或飛擲瓦
礫。居既不安。乃損價鬻之。有閩太尉者。買之以居。其怪如故。人皆
謂凶宅。轉鬻不復售。適官創武憲公廨。乃折買其材。而總管開兆
得其地。上有銀杏樹。大數圍。枝幹尉茂。覆地甚廣。開疑怪所依。乃
伐去之。且發其根下。得遺骸一具。支節皆全。棄湖中。今復爲宅。而
怪不復見。許昇助
教說

紹興丁卯秋。樞密沈公。以臨安教授。被漕檄考試。拈蒼旣入院。夢朱
衣六人。坐於堂而會議。時考官至者。已六人。予亦被檄考校。而獨

後未至。沈與同官言其夢。曰郭簿必不來矣。暨子尋至。皆謂其夢無驗。俄而同官龍游縣丞。有親戚當就試者。舉子譁言紛紛。丞竟不自安。引嫌不待試而出。考校竟止六人。

常熟縣破山寺僧堂。李唐新建。柱有雷神書。凡三虎。蓋昔人所傳謝仙火之類。內一柱。題字最端謹可識。云助溪作火田。凡六字。上一字作從具。從力。字書所無。字皆作隸體。倒書入木三分。不類雕刻。然各去地丈餘。與舊說身長三尺者差異。

劉先生者。河朔人。年六十餘。居衡岳紫蓋峰下。間出衡山縣市。從人丐得錢。則市鹽酪。徑歸。盡則更出。日携一竹籃。中貯大小筆。櫻帚。麻拂。數事。遍遊諸寺廟。拂拭神佛塑像。鼻耳竅有塵上。卽以筆拭。出之。率以爲常。環百里人。皆熟識之。縣市一富人。嘗贈一納袍。劉

欣謝而去。越數日見之。則故褐如初。問之云。吾幾爲子所累。吾常日出庵。有門不掩。旣歸就寢。門亦不扃。自得袍之後。不衣而出。則心繫念。因市一鎖。出則鎖之。或衣以出。夜歸則牢關以備盜。數日營營。不能自決。今日偶衣至市。忽自悟。以一袍故。使方寸如此。是大可笑。適遇一人過前。卽脫袍與之。吾心方坦然。無復繫念。嘻。吾幾爲子所累矣。嘗至上封。歸路遇雨。視道邊一塚有穴。遂入以避。會昏暮。因就寢。夜半將睡。覺雨止。月明透穴。照壙中。歷歷可見。甕磬甚光潔。北壁惟白骨一具。自頂至足俱全。餘無一物。劉方起坐。少近視之。白骨倏然而起。急前抱劉。劉極力奮擊。乃零落墮地。不復動矣。劉出每與人談此異。或曰。此非怪也。劉真氣壯盛。足以翕附枯骨耳。今兒童拔鷄羽置之懷。以手指上下引之。隨應。羽稍折。

斷。卽不應。亦此類也。

趙三翁名進。字從先。中牟縣白沙鎮人。自言遇孫思邈。授以道要。從之十稔。一日留於縣境濟澤村。曰。切勿離此。非天子召勿往也。俟吾再來。與汝同歸。宣和壬寅歲。果被召見。館於葆真宮。頃之丐歸。徽廟詢所欲。奏曰。臣本歸兵。去役未有停放公憑。願得徐賜。餘無所欲。卽日降旨。命開封府尹盛章出給與。其實年已一百八歲矣。技術無所不通。能役使鬼神。知未來事。吹呵按摩。疾痛立愈。密縣墮門山道友席洞雲。築室於獨紇嶺瀑水潭側。慕其清峭高爽。落成甚喜。旣遷入。百怪畢見。未及一年。禍變相踵。席謁翁。且告之故。翁曰。得無居五翦之地乎。席曰。地理之說多矣。素未聞五箭之說。敢問何謂也。翁曰。峰巔嶺脊。陵首隴背。土囊之口。直當風門。急如

激矢者。名曰風箭。峻溪急流。懸泉瀉瀑。衝石走沙。聲如雷動。晝夜不息者。名曰水箭。堅剛燥燥。斤鹵沙磧。不生草木。不澤水泉。硬鐵腥錫。毒蟲蟻聚。散若壞壤者。名曰土箭。層崖疊巘。峻壁巉岩。銳峯峭岫。拔刃攢鏗。聳齒露骨。狀如浮圖者。名曰石箭。長林古木。茂樾叢薄。翳天蔽日。垂蘿蔓藤。陰森肅冽。如墟墓間者。名曰木箭。五箭之地。射傷居人。皆不可用。要在回環紆抱。氣象明透。形勢寬閑。壤肥土沃。泉甘石清。乃爲上地。固不必一一泥天星地卦也。子歸依我言。去凶就吉。當自無恙。席悉遵其教。居止遂安。有頓保義公孺者。苦冷疾二年矣。幾至骨立。百藥不効。一日方灼艾。翁過之。詢其病源。頓以實告。翁令撤去火艾。時方盛暑。俾就屋開三天窗。放日光下射。令頓仰臥。揉艾遍布腹上。約十數斤。就日光灸之。移時覺

熱透臍腹。不可忍。俄而腹中雷鳴。熱氣下泄。口鼻間皆濃艾氣。乃止。明日又復爲之。如是一月疾愈。仍令爲之一百二十日。自此病不作。壯健如初。且曰。此孫真人秘訣也。世人但知着艾炷。而不知點穴。虛忍痛楚。耗損氣力。日者太陽真火。艾既遍腹。又且徐徐照射。功力極大。但近六七月爲上。若秋冬間。當以艾十數斤鋪腹。蒙以綿衣。熨斗盛炭火。徐熨之。候聞濃艾氣方止。亦其次也。其術每出奇而中理。事跡甚多。嵩山張壽昌朋父爲之記。

宣統三年六月付印

宣統三年七月出版



(睽車志)

定價大洋八角

出版者 上海藜光社

發行者 上海藜光社

印刷者 上海藜光社

分售處 各省大書局

總發行所

上海四馬路巡捕房東首惠福里

藜光社

